

1 TIMOTI

Pepa Paulo ingere munya pa Timoti

Timoti nde tamâta limoa tonje munya iyoka kuku Paulo itula pâri ara panzi tamâta lâ lawea pinde (Pâri Tamâta 16:1-5). Njineŋga ilâ imo Efesus lawea ikai poe panzi kalo-tawana tamâta ŋgu simo ŋinde, aku itula Maro Kindeni kawa ŋgua panzi. Paulo ku Timoti rua simo nambwe nambwe sondo, kala Paulo ingere ŋgua ŋine ŋana ipu tini kaika papa wa ipanana i ŋana ikatonanzi ŋgu wa. Ipai Timoti tu ma ipakatona sondo ŋananzi pananâŋa tamâta laŋeŋa, aku itula ŋgua papa ŋana tamâta mana ikura tu imo katonâŋa panzi Maro Kindeni ne ŋgu.

¹ Naŋa Paulo, Yesu Kirisi ne pâri-tamâta naŋa. Nenda Yautâŋa Tamwata Maro Kindeni, aŋga Yesu Kirisi, ina tamâta ŋinde kinda uru tao tininda papa, kinzi rua munya sipatea naŋa, kala apâŋga amo pâri-tamâta. ² Naŋa aŋgere ŋgua lâ pepa ŋine tini imâ pa noko Timoti. Kinda rua kalonda tawana Yesu, aku ŋana nenda kalo-tawana ŋine kê, ande noko kumo kutogo naŋa natuŋgu mao. Tamânda Maro Kindeni ŋga nenda Maro Njalae Yesu Kirisi rua nenzi wisi-wisi wa kalo-sukâŋa wa wisi-pisi wa imo kuno.

Ara ŋana kinda ma talelea ŋgua laŋeŋa rârâni

³ Njine naŋa atu aporo ŋgua kaŋa taituni pa noko kilo, itogo aporo pano munya, lâ zo ŋinde

naŋa alâ pa Masedonia tâno. Naŋa ilonŋu tu noko ma kumo ndainani nâ lâ Efesus lawea, aku kutula ŋgua kaika panzi tamâta pinde ŋana sipile nenzi mâsi ŋana siporo ŋgua laŋeŋa kâ, lâ zo ŋana sipanananzi tamâta ŋana Maro Kindeni ne ŋgua kâ. ⁴ Aku kuporo ŋgua kaika panzi tu ma sipile nenzi mâsi ŋana sitapâri timbunzi nenzi usi kaa nâ, aku sipile nenzi mâsi ŋana siveta ŋgua kie-kie rârâ siporo ŋana timbunzi ŋanzi kâ. Ŋgua kaŋa mine uru iveta ŋgua nâna ipâŋga, aku ŋinde ikura ŋana isuka nenda kalotawana ŋana tasama Maro Kindeni ne ilo-kalo ara kâ, ande tia. ⁵ Ambo tamâta ŋinde ma sipile nenzi mâsi potomule ŋinde, ande nenzi kalotawana ma keno mao pa Yesu Kirisi, aku ma simo ilonzi mbâra-mbâra lâ Maro Kindeni nao, aku ma sipasama tu nenzi soki tonŋe keno tia. Ŋineŋga kinzi ma sio nenzi tini-mwasa ilâ panzi kalo-tawana tamâta. ⁶ Tamâta pinde sipile kalotawana mao ne vetâŋa ara ŋinde, kala ŋine kinzi siporo ŋgua kaa kaa mine. ⁷ Kinzi ilonzi tu sipanananzi tamâta pinde ŋana Maro Kindeni ne ŋgua tukuŋa kâ, aku ilonzi keno tu nenzi ŋgua ndoni nde mao nâ. Kinzi uru situla ŋgua kaika, andeta warakanzi sizizâla ŋana nenzi ŋgua ŋinde ne duvi.

⁸ Kinda tasama tu Mose ne ŋgua tukuŋa nde ara ndo. Taitu kinda ma kalonda ŋgere sondo ŋana tukuŋa ŋinde ne duvi kâ. ⁹ Kinda tasama tu ŋgua tukuŋa ne wurâta ŋandai ŋana itula nzâla panzi tamâta arara ŋga. Ŋgua tukuŋa ne wurâta nde ŋana itula nzâla panzi tamâta ŋinde uru sipu ŋgua tukuŋa ututu ku siveta taŋa-

kaika ne vetâŋa. Kinzi sipu mulinzi pa Maro Kindeni ku siveta vetâŋa potomule nâ. Kinzi simege ŋana Maro Kindeni ku siveta mâsi ara pinde, ande tia. Kinzi uru siveta mâsi sakamao pinde mine: kinzi sipunzi tinanzi tamanzi pâta simâte, aku sipunzi tamâta pinde pâta simâte tona; ¹⁰ kinzi tamâne sipalulua tininzi ilâ potomule panzi taine pinde, aku sipalulua warakanzi tininzi mine nâ kunzi nawalanzi tamâne tona; kinzi sipanawenzi tamâta pinde ku sivetanzi sikai wurâta kaa nâ; aku siporo ŋgua lanjeŋa wa siveta ŋgua pâŋa kaa nâ wa. Mao nâ, ŋgua tukunja ne wurâta nde ŋana itula nzâla panzi tamâta ea uru siveta mâsi potomule ndia ŋandai ipakura kuku ilo-kalo ara. ¹¹ Andeta Maro Kindeni ne ilo-kalo ara ikeno pâri ara tini, pâri ara ŋinde i muŋga itula pa naŋa kala uru aporo atula pwataki. Pâri ara ŋinde itula Maro Kindeni kilala pwataki tu i nde Ara Tamwata, aku nenda paneâŋa ilâ pa i nâ.

Paulo kawa ndanġe pa Maro Kindeni, ŋana tu i kalo sukâŋa ŋana i kâ

¹² Muŋga, nenda Maro Yesu Kirisi imora naŋa tu naŋa akura ŋana aveta wurâta papa i kâ. Mine kala i ne walo ilua naŋa lâ ŋana atula i kawa ŋgua kâ. Ipateana ŋana aveta i ne wurâta ŋine kâ. Mine kala naŋa kawânġu ndanġe papa i. ¹³ Mao nâ, muŋga naŋa aporo ŋgua pavaligiŋa papa i, aku aveta kenġu sakamao panzi i ne tamâta apunzi tona. Andeta isama tu naŋa azizâla ŋana i kâ, aku ŋandai kalonġu tawana i ŋga, kala aveta vetâŋa ŋinde. Mine

kala i kalo sukâŋa ŋanana. ¹⁴ Aku nenda Maro Njalae ne wisi-wisi ŋalae nde imâ ndo pa naŋa lâ, aku igagati ilonŋu kalonŋu ŋana ao nanenŋu kalo-tawana ilâ papa i nâ. Aku i ne wisi-wisi ŋinde igagatina ŋana tiningu mwasa panzi kalo-tawana tamâta tona. Kalo-tawana wa tini-mwasa kie mine uru ikeno pa kinda tamâta rârâni ŋine tapai pa kuku Yesu Kirisi.

¹⁵ Yesu Kirisi indue imâ tâno kulu ŋana iyautenzi kiesaka tamwatanzi piti lâ kondoma ilo. Nŋua ŋinde nde mao kanaŋo, aku ara ŋana tamâta rârâni ma silonŋo ku kalonzi tawana. Aku naŋa warakâŋgu muŋga aveta kiesaka ŋalae ndo, kala amo atogo kiesaka tamwatâŋgu mine, apolenzi tamâta rârâni ŋana aveta kiesaka kê. ¹⁶ Mao nâ, naŋa apolenzi tamâta rârâni ŋana aveta kiesaka kê. Andeta Maro Kindeni kalo sukâŋa ŋanana, ŋana tu itu itula pwataki panzi tamâta ma sipâŋga muli-muli ŋinde tu Yesu Kirisi nao mwasa ndo panzi kiesaka tamwatanzi. Aku tamâta ma sipâŋga muli-muli ŋinde ma simora Yesu ne vetâŋa ŋinde, kala ma kalonzi tawana i, ku ma sikai via ŋana simo ara mine ku simo nâ. ¹⁷ I imo Koipu Njalae ikura zo zo ku imo nâ. I ma nao tia, ande tia ndo. Aku kinda tâno tamâta takura tu matânda tamora i kê, ande tia. Maro Kindeni simbo nâ nde Maro Mao. Mine kala zo rârâni kinda ma tapanea i tasuka ŋa kêki. Mao.

*Paulo itu ŋgua pa Timoti tu ma ipara kaika
ŋana ipu vetâŋa sakamao ndue*

18 Timoti, naŋa natuŋgu noko, naŋa ao nanenŋu ŋgua ŋine imâ pano. Kinzi ŋgua-tulâŋa tamâta pinde muŋga situla ŋgua pwataki ŋana noko kâ, aku nanenŋu ŋgua ŋine nde iyoke nenzi ŋgua ŋinde. Ambo noko ma kalo ŋgere ŋana ŋgua ŋinde kâ, ande ŋinde ma ipu tini kaika pano lâ zo ndia noko kupara kaika ŋana kupu vetâŋa sakamao ndue kâ. 19 Ara ŋana noko ma kalo tawana Yesu kaika lâ paraŋa ŋinde ilo, aku kupasama sondo lâ tamwata ilo kalo tu noko ne soki tonŋe tia lâ Maro Kindeni nao. Maro Kindeni uru itu ŋgua kaika lâ tamâta ilonzi tu ma sipile nenzi vetâŋa soki, andeta kinzi pinde tininzi pwâka tu sipile nenzi vetâŋa ŋinde. Mine kala nenzi kalo-tawana nde imbe ndo lâ, itogo wâŋga ikâki pitiku kulu ku ipwa pwataki mine. 20 Tamâta rua, Himeneus ku Arisande rua, muŋga siveta mine, kala naŋa aonzi rua silâ pa Sadana mbau ilo, ŋana ma kalonzi ŋgere sondo ku sipile nenzi mâsi ŋana siporo ŋgua pavaligiŋa pa Maro Kindeni kâ.

2

Ara ŋana kinda ma tano pa Maro Kindeni tu iveta kie ara panzi tamâta rârâni

1 Naŋa ilonŋu tu noko ma kuveta vetâŋa ŋine muŋga lâ ŋga; kupanananzi kalo-tawana tamâta tu ma kawanzi ndaŋge pa Maro Kindeni ŋana tininzi pinde rârâni, ku sino kaika pa i tu ma iveta kie ara panzi.

2 Ara ŋana kinda ma takai noŋa kaika pa i tu ma iveta kie ara panzi koipu ŋalaŋala wa

kinzi tamâta mbâna-mbâna wa. Ambo i ma iveta mine, ande kinda rârâni ma tamo ara, aku ma tamo tava wisinda pisi nâ. Njineŋga kinda ma taponu muli pa vetâŋa ara rârâni Maro Kindeni ilo papa nŋinde, aku ma taveta vetâŋa ara nâ lâ i nao. ³ Noŋa kie mine nde ara ndo lâ nenda Yautâŋa Tamwata Maro Kindeni nao. Mao nâ, i tini mwasa ndo ŋana noŋa kie mine. ⁴ I ilo tu iyautenzi tamâta rârâni piti lâ kondoma ilo, aku i ilo tu kinzi ma sisama ŋgua mao duvi tona. ⁵ Kinda tasama tu Maro Kindeni simbo nâ nde Maro mao. Aku tasama tu tamâta taitu nâ imandi kinda tamâta ŋga Maro Kindeni ŋgininda ŋana ilulu Maro Kindeni ne wisi-nâna kâ, aku tamâta nŋinde nde Yesu Kirisi tamwata. ⁶ Maro Kindeni muŋga ipatea zo pa Yesu Kirisi, aku lâ zoni ndaina nâ, ande Yesu ipile tamwata ne via ku imâte ŋana ikonzi tamâta rârâni piti lâ kondoma ilo. Aku vetâŋa nŋinde itula Maro Kindeni kilala pwataki pa kinda. ⁷ Maro Kindeni ipatea naŋa tu amo i ne pâri-tamâta, aku wurâta ilana ŋana atula i kawa ŋgua nŋinde pwataki. Naŋa aporo mao, alâŋe tia. I wurâta ilua naŋa ŋana apanananzi tamâta lâ tinikoa ŋgu, ŋana nenzi kalo-tawana ma ilâ mao pa Yesu Kirisi.

⁸ Mine kala naŋa ilonŋu tu kinzi tamâne simo nia ndoni ma sisuka mbaunzi kâki ku sikai noŋa. Naŋa ilonŋu tu kinzi ma sio ilonzi ndo ilâ pa Maro Kindeni, aku ma sipile mâsi ŋana wisinzi nâna wa sipambita wa.

Mâsi ŋana siveta vetâŋa ara kâ ande itogo taine nenzi siŋgâra mao

⁹ Aku naŋa ilonŋu tu kinzi taine ma sisawa pasawaŋa wa sipita lalava sondo, ŋana itula pwataki tu kinzi sipatawa warakanzi tininzi. Naŋa tiningu pwâka tu kinzi ma sipalaki kulunzi ku sisinga kulunzi pwau ŋa tininzi lâ kelekele kulu ŋalae koŋa, itogo mbote-mbote arara wa mira “gol” wa. ¹⁰ Ambo taine ilonzi tu sipono muli pa Maro Kindeni ku sipanea i, ande ara ŋana kinzi ma siveta vetâŋa ara nâ panzi tamâta. Aku nenzi vetâŋa arara ŋinde ma keno itogo nenzi siŋgâra ara mwasina.

¹¹ Naŋa ilonŋu tu kinzi taine ma sipatawa warakanzi tininzi ku sisae kawanzi, aku sipanâna nâ ŋana Maro Kindeni ne ŋgua kê. ¹² Naŋa uru asâu panzi taine ŋana sikai poe panzi tamâne ku sipanananzi ŋana Maro Kindeni ne ŋgua kê, ande tia. Ara ŋana kinzi taine ma kawanzi buu ku sipaloŋo pa ŋgua nâ. ¹³ Ŋana tu Maro Kindeni iveta tamâne Adam muŋga lâ, ŋinenŋa iveta taine Eva muli. ¹⁴ Aku Adam ŋandai kalo tawana ŋgua laŋeŋa ŋa. Taine nâ kalo tawana ŋgua laŋeŋa kala iveta kiesaka. ¹⁵ Andeta Maro Kindeni ne pateâŋa ikeno mine tu kinzi taine nâ ma sipaguguanzi lâlu. Ambo nenzi kalo-tawana ilâ pa Yesu Kirisi ikura zo zo, ku siveta vetâŋa soki tonŋe tia lâ Maro Kindeni nao, ku tininzi mwasa nâ panzi tamâta, ande Maro Kindeni ma iyautenzi piti lâ kondoma ilo.

3

Ŋgua ilâ panzi tamâta mbâna-mbâna uru

sikai poe panzi katonâña
Titi 1:5-9

¹ Ngua njine nde mao kanaanjo: ambo tamâta tonje ilo tu ikai poe panzi ngu nenzi katonâña, ande wurâta itu iveta njinde nde wurâta ara ndo. ² Ambo taitu nanenju ngua pinde ilâ pa tamâta ea itu imo mbwananâña panzi katonâña kâ. Ngua njinde nde mine: i ma iveta vetâña soki tonje tia; i ma ikai kaiwa taine taitu nâ; i ma ipakotona tamwata sondo jana kiesaka kâ; i ma ikai poe sondo pa tamwata ne ilo-kalo; aku i ne vetâña rârâni nde ma ara nâ. I ma ikainzi tamâta lombo ku ikatonanzi simo sondo lâ i ne luma ilo; aku i ma isama pâta jana ipanananzi tamâta jana Maro Kindeni kawa ngua kâ. ³ I ma imo tamâta jana inu lââ kaika ku idauda, ande tia; i ma wisi nâna walele ku ipara kunzi tamâta tia; i ma nao mwasa nâ panzi tamâta; aku i ma ilo njalae koja jana igona mbaliña kâ, ande tia. ⁴ I ma ikatonanzi i tamwata kaiwa-natu sondo, ku ma ipanananzi natu sondo jana silojo i ne ngua ku simege jana i kâ. ⁵ (Ambo tamâta tonje ikura tu ikatonanzi i kaiwa-natu sondo tia, ande i ma ikura jana ikatonanzi Maro Kindeni ne ngu, ande ma tia.) ⁶ Kalo-tawana tamâta wasaseki tonje ikura jana ikai poe panzi katonâña kâ, ande tia. Tia ma i ilo tu i nde tamâta ara ndo, aku ma ipasuka tamwata tini. Aku jana njinde kâ, Maro Kindeni ma io i lâ ngua nia, itogo munja io Sadana lâ ngua nia mine. ⁷ Aku katonâña nenzi poe tamâta ma imo tamâta mine: kinzi tamâta simo niaka jana Maro Kindeni ne ngu kâ, ande ma uru siporo ngua ara nâ jana poe

tamâta ñinde kâ. Nana tu ambo i ma ipakatona tamwata ne vetâña tia, ande kinzi ma siporo ñgua sakamao ñana i kâ, aku Sadana ne nimbu ma ikai i kaika lâ.

Ñgua ilâ panzi ñgu nenzi katonâña

⁸ Aku mine nâ, nanenğu ñgua pinde ilâ panzi ñgu nenzi katonâña tona. Ngua ñinde nde mine: kinzi ma sipakatona warakanzi sondo ñana nenzi vetâña kâ; kinzi ma simo togo memelanzi rua tia; kinzi ma sinu lââ kaika ku sidauda tia; aku kinzi ma ilonzi ñana sitapa tamâta pinde nenzi mbaliña sañenzi, ande tia. ⁹ Kinzi ma kalonzi tawana ñgua mao rârâni Maro Kindeni munğa itula pwataki ñinde, aku ma sipasama lâ warakanzi ilonzi kalonzi tu nenzi soki tonje tia lâ Maro Kindeni nao. ¹⁰ Miki ma kakai samâña panzi ñana nenzi vetâña kâ munğa lâ ñga. Ambo siveta wurâta sondo, ande ma sikura ñana sikai katonâña panzi kalo-tawana tamâta.

¹¹ Aku ñgua pinde kala ilâ panzi taine nenzi katonâña mine nâ. Kinzi ma sipakatona warakanzi ñana nenzi vetâña uru siveta ñinde kâ; kinzi ma siporo situ tamâta ñguananzi tia; kinzi ma sipakatona warakanzi sondo ñana kiesaka kâ, ku ma siveta nenzi wurâta rârâni sondo ndo.

¹² Ngu nenzi katonâña nde ma imo tamâta mine: ikai kaiwa taine taitu nâ, aku uru ika-tonanzi i tamwata kaiwa-natu sondo. ¹³ Ambo ñgu nenzi katonâña ma siveta nenzi wurâta ara, ande tamâta ma siporo ñgua ñananzi mine tu, “Kinzi nde tamâta ara”. Ninenğa katonâña

ņinde ma siruru tia ņana situla nenzi kalo-tawana pwataki tu kinzi kalonzi tawana Yesu Kirisi.

Ŋgua ņalae ņana Yesu Kirisi kâ

¹⁴Timoti, naņa ilonĝu tu amâ walele amorano, andeta ara ņana anĝere ņgua pinde pano lâ pepa tini tona. ¹⁵Mine kala, ambo naņa akura tu amâ walele tia, ande noko ma kusama sondo ņana vetâņa arara Maro Kindeni ilo tu i ne tamâta ma siveta ņinde. Kinda tamo Maro Kindeni Via Tamwata ne tamâta, tatogo i natu wukale mine, aku kinda ņĝu ņine uru takatona i ne ņgua mao ku tatula pwataki. ¹⁶Kinda tasama tu ņgua mao Maro Kindeni itula pwataki ņinde nde ņgua ņalae tina. Ŋgua ņinde nde mine: “Kirisi indue imâ ipâņa tâno kulu itogo tamâta mine, aku i ne mandîņa lâ mateņa nianzi itula pwataki tu i nde Maro ņalae. Kinzi aņelo rârâni nde simora i kilala pwataki, aņga ne kalo-tawana tamâta nde silâ situla i parina panzi tamâta ņĝu ndoni, aņga tamâta rârâ pa tâno ndoni nde kalonzi tawana i. Maro Kindeni ikai i kâki lâ samba ilo, aku imo ikai Maro ņalae.”

4

Ŋgua laņeņa kie-kie uru izavaru tamâta ilonzi kalonzi

¹Koroani Sapâņa itula ņgua pwataki tu lâ zo muli ņana tâno ne zo marumbu kâ, ande tamâta pinde ma sipile nenzi kalo-tawana. Kinzi ma sipalono pa ņgua ņinde koroani laņeņa sipanananzi tamâta, ku ma sipono muli pa

koroani saka nenzi ngua njinde. ² Lanjeņa tamwatanzi pinde ma situla ngua lanjeņa panzi kalo-tawana tamâta. Tamâta njinde sipayaula warakanzi ilonzi kalonzi marumbu lâ, kala sizizâla tu nenzi vetâņa nde kiesaka. ³ Lanjeņa tamwatanzi njinde ma situ kaika panzi tamâta tu ma sipakâe kaiwanzi tia, aku ma situ kaika panzi tu ma sika kâpwa pinde tia tona. Andeta Maro Kindeni iveta kâpwa rârâni njinde pa kinda tu taka. Kinda kalonda tawana i, aku tapanâna lâ njana ngua mao kâ. Mine kala kinda takura njana takai kâpwa njinde, aku taka tava kawânda ndanġe papa i. ⁴ Kinda tasama tu kelekele rârâni Maro Kindeni munġa iveta njinde nde kelekele ara nâ. Kinda ma tamora njinde tu kelekele sakamao ndimo. Kinda takura tu kawânda ndanġe pa Maro Kindeni, ku takai taka, ⁵ njana tu Maro Kindeni kawa ngua tava nenda noņa iveta kelekele rârâni wa kâpwa rârâni wa ipânġa zuzuli lâ i nao.

Paulo itu ngua pa Timoti tu i ma imo itogo Yesu Kiriŝi ne wurâta tamâta ara mine

⁶ Timoti, ambo noko ma kutula ngua njinde pwataki panzi kalo-tawana tamâta, ande noko ma kumo Yesu Kiriŝi ne wurâta tamâta ara. Kupakatona tamwata ne ilo-kalo sonġo, aku kupono muli pa Maro Kindeni ne ngua mao tava ne ngua njinde munġa sipananano kala uru pwoka muli njinde. ⁷ Noko ma kupu muli papa usi tapârîņa kaa nâ tamâta pinde uru sitapârî njinde, aku kupanâna sonġo njana kuveta vetâņa ara nâ lâ Maro Kindeni nao. ⁸ Ambo kinda ilonda tu taveta karaenda ipânġa kaika, aku tapatogo

tininda ikura zo rârâni, ande ñinde ma ivila kinda ñalae koña tia. Andeta kuloño ñga; ambo kinda ma taveta vetâña ara lâ Maro Kindeni nao ikura zo rârâni, ande ñinde ma ivila kinda ñalae tina. Vetâña ñinde ikura tu ivila kinda ñana tamo ara lâ zo ñine tamo tâno kulu wa lâ zo muli tona.

⁹ Ñgua ñinde nde mao kanaño, aku ara ñana tamâta rârâni ma siloño ku kalonzi tawana. ¹⁰ Nanayoni kinda tao nenda kalo-tawana ilâ sondo ndo pa Maro Kindeni, ina Via Tamwata. I ilo tu iyautenzi tamâta rârâni piti lâ kondoma ilo, aku ina uru iveta mine nâ pa kinda tamâta ñine kalonda tawana i mao. Kinda nenda kalo-tawana keno mine, aku ñana ñinde kâ kinda uru tao tininda papa i ku tamakâsa ñana taveta nenda wurâta ñine sondo.

¹¹ Noko ma kutula ñgua ñinde pwataki panzi kalo-tawana tamâta, aku kupanananzi tu ma soka muli. ¹² Kinzi uru simora noko tu tamâta lâlu, andeta naña tiningu pwâka tu kinzi ma ilonzi tu noko nde tamâta kaa nâ. Noko ma kuveta mâsi ara nâ, aku kutula nzâla sondo panzi kalo-tawana tamâta. Kutula nzâla panzi ñana siporo ñgua ara kâ, aku kutula nzâla panzi ñana siveta vetâña ara nâ tona. Kutula nzâla panzi ñana tininzi mwasa ndo panzi tininzi pinde kâ, aku kutula nzâla panzi ñana kalonzi tawana Maro Kindeni kâ tona. Aku kutula nzâla panzi ñana sipile vetâña potomule ndoni kâ. ¹³ Noko ma pwai wurâta sondo ñana kupono Maro Kindeni ne ñgua ñinde ikeno lâ pepa tini panzi tamâta, aku kutula ñgua ñinde duvi pwataki panzi wa kupanananzi sondo wa.

Kuveta mine lee, ikura lâ zo ndia naŋa ma amâ apâŋga amo kuno. ¹⁴ Noko ma kumbariri ŋana kuveta wurâta ŋinde kê ndimo, ŋana tu Maro Kindeni muŋga walo ilano, itogo wisi-ara ŋana noko ne wurâta ŋinde kê. Iveta mine lâ zo ŋinde ŋgu nenzi katonâŋa situla Maro Kindeni kawa ŋgua pwataki ŋana noko kê, ku sio mbaunzi kâki noko kulu situ nzâmbe pano.

¹⁵ Ikura zo rârâni, noko ma pwatona ne wurâta ŋinde sondo. Ambo noko ma kuveta wurâta ŋinde kaika, ande tamâta rârâni ma sisama tu muŋga noko kumo wurâta tamâta ara mwasa, aŋga ŋine kupâŋga wurâta tamâta ara ndo. ¹⁶ Kupakatona sondo ŋana noko tamwata ne vetâŋa wa ŋgua ndia kupanananzi tamâta wa. Ambo noko ma kumandi kaika ndo ŋana kuveta mine, ande noko ma kupavila tamwata, ku ma kuvilanzi tamâta ŋinde uru siloŋo noko ne ŋgua mine nâ.

5

Paulo itu ŋgua pa Timoti tu ma iveta vetâŋa kie taituni panzi tamâta itogo uru iveta panzi i see mine

¹ Noko ma kumbitanzi tamâne kokoŋa ndimo. Ambo kinzi ma siveta vetâŋa soki tonŋe, ande kuvetanzi sondo ku kuporo ŋgua mwasa nâ panzi, itogo uru kuveta pa noko tama mine. Aku noko ma kuveta vetâŋa kie taituni panzi tamâne limoa, itogo uru kuveta panzi noko tamwata taitua mine. ² Aku noko ma kuveta vetâŋa kie taituni panzi taine kokoŋa itogo uru kuveta pa

noko tina mine. Aku kuveta vetâŋa kie taituni panzi taine taipa, itogo uru kuveta panzi noko mwane mine. Noko ma kuveta vetâŋa potomule panzi taine taipa ndimo.

Ea ma ikatonanzi taine mwala mwala

³ Ambo taine mwala tonje simbo nâ imo, ande ara, kupanananzi ŋgu ŋana sivila i ku siveta vetâŋa rârâni sondo nâ papa. ⁴ Andeta kuloŋo ŋga; ambo taine mwala tonje natu-timbu simo, ande ara ŋana kinzi ŋinde ma sipanâna sondo ŋana ŋine kâ: nenzi wurâta ŋalae lâ Maro Kindeni nao nde ŋana sikatona warakanzi seenzi sondo muŋga lâ ŋga. Lâ nenzi vetâŋa ŋinde, ande kinzi ma sikatu tinanzi tamanzi wa timbunzi nenzi wurâta kulu panzi, ŋana tu muŋga kokoŋa ŋinde sikatona kinzi mine. Aku nenzi vetâŋa ŋinde ma itula pwataki tu nenzi kalotawana nde mao. Maro Kindeni ilo ara ndo ŋana vetâŋa mine kâ. ⁵ Ambo taine mwala tonje simbo nâ imo, ande ara ŋana ma sikatona taine ŋinde sondo, ŋana tu i kalo tawana Maro Kindeni, aku uru io tini ŋana Maro Kindeni tu ma ikea ŋana i kâ. Aku ikura zo rârâni, lâ kari wa mbo wa, i uru ino pa Maro Kindeni ŋana isuka i kâ. ⁶ Andeta kuloŋo ŋga; ambo taine mwala tonje ilo ŋalae ŋana tâno ŋine ne vetâŋa kâ, kala itambira ne mbaliŋa ku indeka potomule, ande ŋinde itogo i ne kalo-tawana imâte lâ. ⁷ Aku noko ma kupanananzi ŋgu tona ŋana sipaveta kuku nanenŋu ŋgua ŋine, ŋana ma simo sondo nâ. Ambo kinzi ma simo sondo mine, ande tamâta tonje ma ikura ŋana iporo ŋgua soki ŋananzi, ande tia. ⁸ Noko kalo ŋgere

sondo nga; ambo tamâta tonje ikatonanzi i tamwata see wa i see katiŋe wa sondo tia, ande ne mâsi nŋinde itula i kilala pwataki tu i ipu muli pa ne kalo-tawana marumbu lâ. Opopo, kinzi tinikoa nŋandai uru siveta vetâŋa soki mine pa seenzi nŋa!

⁹ Noko ma kuŋgere taine mwala mwala rârâni nŋanzi lâ pepa tini nŋana nŋu ma sikatonanzi kâ, mine ndimo. Kuŋgere taine mwala nŋine nâ nŋa lâ pepa tini: ipole mbwera tamâta nŋato (60) lâ; i muŋga imo kuku kaiwa tamâne simbo nâ; ¹⁰ i muŋga ikatonanzi natu sondo; i uru isuanzi tamâta lombo soka lawea pinde simâ; i uru ikai kuleŋa panzi kalo-tawana tamâta nŋana ipua kenzi kâ; i uru ivilanzi tini pinde nŋana nenzi malia kâ; aku i uru ilo ndo nŋana iveta vetâŋa ara pinde tona. Ambo tamâta uru situla taine koŋa tonje parina tu i nde taine nŋana iveta vetâŋa ara mine kâ, ande ara, noko ma kuŋgere taine nŋinde nŋa lâ pepa tini nŋana nŋu ma sikatona kâ.

¹¹ Andeta noko ma kuŋgere kinzi taine taipa simo mwala nŋinde nŋanzi lâ pepa nŋinde tini ndimo. Nŋana tu muli kinzi ma ilonzi kâki nŋana sikâe kilo, aku ma sipu mulinzi pa Yesu Kiriŋi.

¹² Mine nde muli Maro Kindeni ma ipare nia panzi, nŋana tu sitoto nenzi nŋua pâŋa utu lâ.

* ¹³ Andeta nŋinde nâ tia; kinzi taine taipa simo mwala nŋinde uru sikai wulitia tona, aku soka potomule silâ pa luma pinde. Andeta kinzi

* **5:12** 12 Nenzi mâsi nde mine; lâ zo ndia taine mwala tonje isâu panzi katonâŋa tu ma singere i nŋa lâ pepa tini nŋana nŋu ma sikatona, ande taine nŋinde ipa nŋua kaika tu ma ikâe kilo tia.

uru sikai wulitia nâ tia; kinzi ilonzi koŋa ŋana situ tamâta ŋguananzi tona, aku sipete silâ wa simâ wa, siporo ŋgua nao-muli wa ŋgua ara tia wa. ¹⁴ Mine kala naŋa ilonŋu tu taine taipa simo mwala ŋinde ma sipakâe kilo, aku ma sikainzi nenzi vâsa ku sikatona warakanzi nenzi luma. Ambo siveta mine, ande ara, kazâŋa tamâta tonŋe ma ikura ŋana imora nenzi vetâŋa soki tonŋe ku iporo ŋgua potomule ŋana kinda kalo-tawana tamâta kâ, ande ma tia. ¹⁵ Noko kusama tu taine taipa pinde kaiwanzi simâte lâ, aku sipile nenzi kalo-tawana ku sipono muli pa Sadana.

¹⁶ Ambo taine mwala tonŋe tina tâku tai tâku nitâpi tâ nde kalo-tawana taine, aku taine ŋinde uru imo kuku, ande ara ŋana kalo-tawana taine ŋinde ma ikatona taine mwala ŋinde. Ambo iveta mine, ande ma kalo-tawana tamâta ŋgu nenzi malia ŋana sikatona taine mwala ŋinde kâ, ande ma tia. Ninenŋa ŋgu ma ikura tu ikatonanzi taine mwala mwala ŋinde simonzi nâ.

Kinda ma kulu talanzi katonâŋa ea uru siveta wurâta ara

¹⁷ Ara ŋana kalo-tawana tamâta ŋgu ma kulu ara silanzi katonâŋa ea uru siveta nenzi wurâta ara nâ. Aku ara ŋana kulu ŋinde ma kâki panzi katonâŋa ŋinde uru situla Maro Kindeni ne ŋgua ku sipanananzi tamâta ŋana Maro Kindeni ne ilo-kalo. ¹⁸ Nana tu Maro Kindeni kawa ŋgua ikeno lâ pepa tini mine tu, “Miki ma kapono bulmakao kawa lâ zo ŋana ikai wurâta ŋana

ipopo kaniņa karae piti, mine ndimo”. † Aku ŋgua pinde kala keno mine tu, “Wurâta tamâta ma ikai ne kulu”. ¹⁹ Ambo tamâta taitu nâ iporo ŋgua tu, “Katonâņa ŋinde nde iveta vetâņa soki”, ande noko ma kalo tawana i ne ŋgua ndimo. Taitu kuloŋo ŋga; ambo tamâta rua wa ŋato siporo ŋgua mine, ande ara, kuloŋo nenzi ŋgua sondo. ²⁰ Ambo katonâņa tonje iveta kiesaka, ande ara ŋana noko ma kulelea i ku kuveta ne ŋgua sondo lâ kalo-tawana tamâta ndoni naonzi, ŋana kinzi pinde ma siruru ŋana siveta kiesaka mine kê.

Paulo itu ŋgua pa Timoti tu ma ipakatona sondo ŋana i tamwata ne vetâņa kê

²¹ Lâ Maro Kindeni nao, aŋga lâ Yesu Kirisi nao, aŋga lâ kinzi aŋelo naonzi, naŋa aporo ŋgua kaika pano mine tu noko ma kupaveta kuku ŋgua tukuŋa ŋine. Noko ma kuveta vetâņa kie taituni panzi tamâta rârâni. Noko ma kuveta vetâņa tonje panzi tamâta ŋalaŋala wa ninambwe wa, aŋga kuveta vetâņa tonje panzi tamâta pinde, mine ndimo.

²² Aku noko ma walele nâ kuo mbau lâ tamâta kulunzi ŋana itula pwataki tu Maro Kindeni ipateanzi ŋana siveta wurâta papa i kê, mine ndimo. Ambo noko kutu nzâmbe pa tamâta tonje, andeta muli iveta kiesaka, ande ne kiesaka ŋinde ma imâ iloko lâ noko tini, aku ŋinde ma ara tia ndo. Kupakatona tamwata

† **5:18** 18 Lâ zo ŋana bulmakao siveta wurâta ŋinde, ande nenzi katonâņa tamâta sisâu panzi tu sika kaniņa pinde. Tia ma putole ipunzi, ku ma siveta wurâta ara tia.

sondo, ɲana ma kumo mbâra-mbâra lâ Maro Kindeni nao.

²³ Naɲa ilonɲu tu noko ma kupile ne vetâɲa ɲana kunu lââ kaa nâ. Ara ɲana noko ma kunu lââ waini nuɲa mwata tona, ɲana tu ɲinde ma isukano ɲana pukonɲa kie-kie ɲinde uru ikeno pano ku iyaula noko kapwa.

²⁴ Tamâta pinde nenzi kiesaka nde ikeno nia yo, aku nenzi kiesaka ɲinde nde ilâ pa Maro Kindeni ne ɲgua nia imunɲa panzi. Anɲa tamâta pinde nenzi kiesaka nde ikeno paveâɲa nâ, andeta muli ɲga nenzi kiesaka ɲinde ma ipânɲa nia yo. ²⁵ Aku mine nâ, tamâta nenzi vetâɲa ara uru ipânɲa nia yo. Ambo tamâta pinde nenzi vetâɲa ara ipânɲa nia yo walele tia, ande vetâɲa ara ɲinde ma ikura tu ipavea zo râràni kê, ande tia.

6

Paulo ɲgere ɲgua panzi tamâta uru siveta wurâta koa tia nâ panzi tamâta ɲalanɲala

¹ Kalo-tawana tamâta pinde uru sikai wurâta koa tia nâ panzi tamâta ɲalanɲala. Aku naɲa aporo ɲgua ilâ pa kinzi ɲinde mine tu ara ɲana ma simege ɲana nenzi koipu ku simo kalonzi. Ambo siveta mine, ande nenzi koipu ma sikura tu siporo ɲgua potomule ɲana Maro Kindeni wa nenda kalo-tawana wa, ande ma tia. ² Ambo wurâta tamâta kaa nâ tonɲe ne tamâta ɲalae nde kalo-tawana tamâta, ande wurâta tamâta ɲinde ma ilo mine tu, “Nɲine nde niɲgu-nambwe nâ; mine nde kalo loko, naɲa ma avaligi i ne ɲgua”, mine ndimo. Ara ɲana i ma ilo keno

mine, “Tamâta ñine kala aveta wurâta papa ñana asuka i kâ, i nde ninggu-nambwe kalotawana tamâta; mine kala naña ma tininggu mwasa ndo papa i”. Ambo wurâta tamâta ilo keno mine, ande i ma iveta wurâta ara ndo papa. Noko ma kupanananzi ku kuporo ñgua kaika panzi mine.

Vetâña ñana ilonda ñalae pa mbaliña kâ, ande vetâña sakamao rârâni duvi

³ Nenda Maro Ñalae Yesu Kirisi ne ñgua mao nde uru ipanana kinda rârâni sondu ñana Maro Kindeni ne ilo-kalo kâ. Ambo tamâta tonje ipile ñgua ñinde, aku ipanananzi tamâta ñana ñgua lanjeña pinde, ⁴ ande tamâta ñinde ipasuka tamwata tini nâ. I taña kaika nâ, aku isama sâ tonje tia. I ilo ñalae koña ñana ipawa ñgua kunzi tamâta kâ. Aku vetâña ñinde uru iyaulanzi tamâta ilonzi kalonzi, kala sipadâda wa sipara wa situ tamâta ñguananzi wa ilonzi sakamao ñananzi tamâta pinde wa ⁵ sipawa ñgua ñalae wa. Kinzi tamâta ñinde nde kapa ndo, aku sisama ñgua mao tonje tia ndo. Kinzi ilonzi tu nenzi kalo-tawana ma isukanzi tu sipânnga simo mbaliña warakanzi. ⁶ Andeta tia. Mao nâ, ambo kinda tapaveta kuku vetâña ndia Maro Kindeni ilo papa ñinde, ande kinda ma ilonda yosi ñana mbaliña kâ, ande tia. Ambo kinda tamo mine, ande ñinde itogo kinda tamo mbaliña warakânda mine.

⁷ Kinda tasama tu lâ zo ñana tinânda sipagugua kinda tapânnga tâno kulu, ande kinda tapânnga tava tininda kaa nâ. Aku lâ zo ñana

tamâte, ande kinda ma takai kelekele tonje iyoka ku kinda, ande tia. ⁸ Mine kala, ambo kâpwa nga lalava ikeno pa kinda, ande ara, kinda ma tandeka ku taporo tu, “Njine nde ikurana”. ⁹ Anja tamâta ea ilonzi tu sigona mbaliņa rârâ, ande samâņa uru ipânģa panzi ku ikainzi kaika, itogo nimbu ikai nģoa mine. Aku ilonzi igagatinzi nana siveta vetânģa soki rârâ. Aku nģinde iveta ilonzi kalonzi ipânģa kapa ndo, kala sipayaula warakanzi ku simo sakamao ndo. ¹⁰ Nana tu vetânģa nana ilonda nģalae pa mbaliņa kâ, ande nģinde nde vetânģa sakamao rârâni duvi. Muņģa tamâta pinde ilonzi nģalae ndo pa mbaliņa kâ, aku ilo-kalo nģinde izavarunzi ndo lâ. Mine kala sipile nenzi kalo tawana, aku sisânda malia nģalae tina kulu.

Ara nana kinda ma tamandi kaika ku takai via mao

¹¹ Anja noko nde Maro Kindeni ne wurâta tamâta. Mine kala ara nana noko ma kupu muli pa vetânģa sakamao kie-kie nģinde, aku tini piti ndo nana. Kumandi kaika ku kuveta vetânģa rârâni Maro Kindeni ilo tu ma taveta. Noko ma kuveta vetânģa arara nâ, ikura kinzi kalotawana tamâta mao uru siveta mine. Kuo ne kalo-tawana ilâ sondo ndo pa Yesu Kirisi, aku tini mwasa nâ panzi tini pinde. Noko ma pwai wulitia nana ne wurâta kâ ndimo. Noko ma nao mwasa nâ panzi tamâta. ¹² Kinzi tamâta nana sipalilu sipopole kâ nde uru sipalilu kaika nâ. Aku mine nâ, ara nana noko ma kupalilu kaika nana pwai ne via mao nana ma kumo ara mine ku kumo nâ. Muņģani, lâ zo nģinde

noko kumandi ku kutula ne kalo-tawana pwataki lâ tamâta rârâ naonzi, ande lâ zoni ndaina Maro Kindeni isarâwa pano tu pwai via ninde. ¹³ Naja aporo ngua kaika pano lâ Maro Kindeni Via Warika nao, anja lâ Yesu Kirisi nao, ina munja imandi kaika lâ Pontius Pilata nao ku itula ne kalo-tawana pwataki. Nanenju ngua nde mine; ¹⁴ Noko ma pwoka tukunja njine muli. Ambo noko ma kumo sonde mine, ne soki tonje tia, ande tamâta tonje ma ikura nana iporo ngua sakamao tonje nanano, ande tia. Noko ma kumo mine lee, ikura lâ zo muli njinde nenda Maro Njalae Yesu Kirisi ma itaulo imâ kilo. ¹⁵ Yesu Kirisi ma ipanga lâ zo tonje nia ndoyo Maro Kindeni ipatea papa keno lâ. Kinda nenda paneanja wa ndekanja wa ilâ pa Maro Kindeni. I simbo nâ ikai Maro panzi tamâta rârâni lâ tâno ndoni. Imo Koipu Njalae panzi koipu njalanala rârâni, aku imo Maro Njalae panzi maro rârâni. ¹⁶ Maro Kindeni simbo nâ ikura nana imâte tia. I imo sinâla njalae ilo, aku tamâta tonje ikura nana ilâ i tini laiti kê, ande tia. Tamâta tonje munja imora i nao, ande tia, aku tamâta tonje ikura nana imora i nao kê, ande tia. Ikura zo zo, nenda paneanja ilâ papa i simbo nâ. I nde Walo Tamwata, uru imo mine ku imo nâ. Mao.

Paulo ipainzi mbaliŋa warakanzi tu ma kalonzi tawana Maro Kindeni ku sivilanzi tininzi pinde

¹⁷ Noko ma kuporo ngua kaika panzi tamâta simo mbaliŋa warakanzi lâ tâno njine kulu tu kinzi ma sipasuka warakanzi njanzi kêki ndimo.

Aku kupainzi tu ma sio nenzi kalo-tawana ilâ pa kelekele uru nao tia walele nâ, mine ndimo. Kuporo ngua kaika panzi tu ma kalonzi tawana Maro Kindeni mao nâ, nana tu i uru kelekele arara kie-kie ilua kinda nana takai ku tandeka kâ. ¹⁸ Noko ma kupainzi tu ma siveta vetâna arara kie-kie nana sivilanzi tininzi pinde kâ. Nenzi vetâna ara ninde nâ nde itogo nenzi mbaliña mao. Ara nana kinzi ma sindeka nana kelekele rârâ silanzi sugorai tamwatanzi. ¹⁹ Ambo kinzi ma siveta vetâna mine, ande ninde itogo sigona mbaliña rârâ nana isuka warakanzi lâ zo muli. Mine kala kinzi ma sikura tu sisaña via mao kaika.

Paulo itu ngua kulu pa Timoti tu ma ikatona ne wurâta sondo

²⁰ Timoti, Maro Kindeni munğa ipatea wurâta ninde pano. Mine nde ara nana noko ma pwatona wurâta ninde sondo. Ambo ngua tonje iyoke Maro Kindeni kawa ngua tia, ande kupu muli pa ngua lanjeña potomule ninde. Ambo tamâta kapa pinde ma situla ngua lanjeña ku siporo tu, “Nîne nde ilo-kalo ara”, ande noko ma kupu muli papa ngua ninde tona. ²¹ Munğa tamâta pinde kalonzi tawana Yesu Kirisi, andeta muli, ninenğa sipile nenzi kalo-tawana ku sipono muli pa ilo-kalo soki ninde.

Maro Kindeni ne wisi-wisi imo kumi.

MARO KINDENI KAWA NGUA
The New Testament and Psalms in the Sio Language
of Papua New Guinea
Nupela Testamen long tokples Sio long Niugini

Copyright © 1995 Wycliffe Bible Translators

Language: Sio

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-02-09

PDF generated using Haiola and XeLaTeX on 4 Mar 2023 from source files dated 22 Nov 2019

b3b81168-89df-5bc3-8b0c-cf72ef93d3de